


قصة قصيرة

حيثما تكون المحبة يكون الله



كل ما فعلتموه بأحد إخوتي هؤلاء الأصاغر، فبي قد فعلتم ... آية بنقراها كثير لكن هل
بنعملها؟

Leo Tolstoy

10 دقائق قراية

العجوزان

القصة الرمزية دي (من كتاب العجوزان) تدور أحداثها في روسيا سنة 1885م

 مارتن اسكافي شغلته تصليح الأحذية و ورشته اللي في وسط المدينة هي بيته ... و كان فيها شباك طويل قزاز بطول الشقة كلها، يقدر من خلالها يشوف الناس اللي في الشارع و هم يشوفوه ... مارتن شاطر أمين في شغله عشان كده ماكانش فقير أو محتاج

 مارتن ماكانش له في ربنا و ماكانش بيروح الكنيسة كثير ولا بيقرأ في الكتاب المقدس ... و بعد وقت حس إنه بدأ يكبر في السن، و كان عايش لوحده بعد ما ماتت زوجته و مات بعدها ابنه الصغير و هو عنده 3 سنين ... من بعدها مارتن زعل من ربنا و كان متذمّر على ربنا اللي أخذ ابنه الصغير و سابه هو حي و هو شيخ

 و في يوم قابل واحد صاحبه من الكنيسة و حكى معاه ... و صاحبه كلمه عن حكمة ربنا و إن كل الأشياء تعمل معاً للخير ... مارتن ماقتنعش و قال له: طيب هاعيش لمين بعد ما ابني مات؟! صاحبه قال له: عيش عشان ربنا ... اقرا كتابه المقدس و انت هاتلاقي إجابات لأسئلتك و سعادة و تغيير في حياتك

 مارتن كان بيعرف يقرأ و قرّر يجرب نصيحة صاحبه ... جاب كتاب مقدس و بدأ يقرأ على خفيف وقت الراحة بس ... بعد كده ارتاح للكتاب المقدس و بقى بيقرأ كثير ... و بدأ يفهم الطريق إلى الله و بدأ اليأس و الحزن اللي جوة قلبه يبقى بدلاً منه شكر و تمجيد و تسليم لربنا ... و بقت حياته بين شغله و بين الكتاب المقدس، بطل الخمر و بطل يقعد على القهوة مع أصحابه

 و في يوم، شدّ انتباهه كلام المسيح لسمعان الفرّيسي عن المرأة الخاطئة اللي سكبت الطيب على قدميه:

ثم التفت إلى المرأة وقال لسمعان: «أتنظر هذه المرأة؟ إني دخلت بيتك، وماء لأجل رجلي لم تعط. وأما هي فقد غسلت رجلي بالدموع ومسحتها بشعر رأسها. قبلت لم تقبلني، وأما هي فمئذ دخلت لم تكف عن تقبيل رجلي. بزيت لم تدهن رأسي، وأما هي فقد دهنت بالطيب رجلي.

و بدأ يحاسب نفسه إنه ممكن يكون زي سمعان الفرّيسي، يا ترى هل لو السيّد المسيح كان ضيفي كنت هاهتم بنفسي زي سمعان ولا هاستضيفه كويس؟
... غرق مارتن في الفكرة دي و نام نوم عميق



سمع صوت منخفض لحد بينده عليه باسمه فصحي بس مالحاش حد ... بس الصوت قال بوضوح:

مارتن ... راقب الطريق بكرة كويس عشان أنا هاجيلك

طبعاً مارتن اتلخبط و فكّر: هل يسوع هاييجي يزورني! ... و بعد ما صبي ثاني يوم، قرّر يراقب الطريق كويس



و في نص اليوم كده، لقي جندي عجوز غلبان هو يعرفه اسمه ستيبانك جنب بيته ... بيسند راسه عاليحيط بتاع بيته من التعب و بيحاول يشيل الثلج عن لبسه ... في الأول مارتن كمل مراقبة للطريق ... لكن فضل الجندي ده في مكانه و وشّه عليه علامات التعب و الإجهاد الشديد مارتن قرّر يعزمه على كباية شاي



خَبَط لستيبانك على الشباك و دعاها للدخول ... طبعاً ستيبانك فرح جداً و دعا له إن ربنا يبارك له ... و مارتن كان كريم جداً معاه و ضايفه كأنه أخ أو صديق عزيز ... و كباية شاي جابت الثانية ... و لاحظ ستيبانك إن مارتن مركز على الشباك، سأله: انت مستني حد؟ فحكى له مارتن الحكاية بعد كده قال له: أنا دلوقتي شاغلني فكرة غير فكرة سمعان و المرأة الخاطئة ... فكرة إن ربنا كان متواضع جداً و مش بيحتقر حد بل على العكس اختار تلاميذه ناس غلبة ... و غسل رجليهم كمان ستيبانك لها سمع كده تأثر جداً و شكر مارتن إنه أعطاه غذاء لجسده و لروحه كمان



بعد ما مشي ستيبانك، فِضِل مارتن يراقب الطريق ... بعد شوية وقفت قدام الشباك بتاعه ست فقيرة غلبانة لبسها مقطع و معاهها طفل على يديها عمّال يبكي ... مارتن خرج و نده على الست و دعاها للدخول ... طبعاً الست استغربت لكن اطمئنّت لأنه كان راجل عجوز، فدخّلت و مارتن طبخ لهم أكلة سريعة و فِضِل يلعب الطفل لحد ما بطل بكاء و ضحك



بعد كده الست حكّت له حكايتها ... كانت زوجة لأحد الجنود اللي راح مهمة و مارجعش ... اشتغلت طبّاخة في بيت لحد ما ولدت بعد كده مشّوها من الشغل ... و بقي لها 3 شهور بتكافح إنها تعيش و تلاقي شغل، و باعت كل اللي عندها ... و كانت رايحة تقابل سيدة غنية قالت لها إنها ممكن تشغلها

مارتن دؤّر عنده على عباية ثقيلة و أعطاهها للست ... و أعطاهها كمان فلوس للمواصلات و حكى لها على حكايته ... الست عيّطت من التأثر و باركته و باركت ربنا و مشيت



بعد ما الست مشيت فِضِل مارتن مركّز على الشباك مستني السيد المسيح ... لَفَت نظره ست كبيرة شايلة سَبَت فيه شوية تفاح عشان تبيعه ... و فجأة، جري عليها ولد صغير و خطف منها تفاحة و جري ... لكن الست قدرت تمسكه فبدأت تشتمه و تضربه مارتن جري بسرعة على الشارع ناحيتهم و قال للست تسامح الولد الصغير ... لكن هي قالت له: إن الولد لازم يدفع التّقن و صقمت توذّيه على قسم الشرطة الولد طبعاً فضل يبكي من الخوف ... و مارتن قال للست إنه هايدفع هو تَمَن التفاح ... الست غضبت و قالت إن مارتن بيدلّعه، و إن الولد لازم يتجلد عشان يتعلّم مايعملش كده ثاني في حياته ... كانت إجابة مارتن:

دي طريقتنا إحنا في الشدّة مش طريقة ربنا ... لو الولد لازم يتجلد لأنه سرق تفاحة، يبقى إحنا بقى خطايانا عقابها المفروض يبقى إيه؟



طبعاً الست سكتت تماماً ... فبدأ مارتن يحكي لها و للولد مثل العبد اللي سيّدّه سامحه على الدين الكبير اللي عليه بينما هو ماسامحش أخوه العبد اللي كان مديون له بالقليل جداً ... و إزاي السيد في المثل أمر بضرب العبد الظالم اللي ماسامحش أخوه الست قالت له: معاك حق، بس إحنا ماينفعش نعدّي الموضوع كده و لازم نوجّه الولد مارتن قال لها: صح لكن بطريقة صحيحة الست حكّت له حكايتها و إنها جدة و عندها أحفاد كثير صغيرين بتحبهم و مضطرة تشتغل عشانهم ... و لها افتكرت أحفادها اللي في عُمر الولد، قالت لمارتن: دي أكيد شقاوة و هاتعدّي ... و طبطبت على الولد ... و الولد ساعدها و شال عنها سَبَت التفاح، و مشيوا و هم بيتكلموا مع بعض



مارتن رجع ثاني يبص من الشباك كل شوية ... بعد شوية الليل ليّل و الدنيا ضلّمت .. فقال ده معاد قراية الكتاب المقدس ... فتح كتابه المقدس عشان يكمل إنجيل لوقا لكن لقي الكتاب بيفتح في مكان مختلف و فجأة سمع صوت ناس بتتحرك من حواليه ... لَفَ عشان يبصّ، لقي ستيبائك و الست اللي معاها الطفل الصغير و الست العجوزة و الولد، كلهم بيتسموا له ... و فجأة اختفوا و لها بصّ مارتن في الكتاب المقدس، لقي الآية دي:

لأنني جعت فأطعمتموني. عطشت فسقيتموني. كنت غريباً فأويتموني. عرياناً فكسوتهموني. مريضاً فزرتموني. محبوساً فأتيتم إليّ.

بما أنكم فعلتموه بأحد إخوتي هؤلاء الأصاغر، فبي فعلتم

— متى 25 : 35 و 36 و 40

ففهم مارتن إن رؤيا امبارح كانت حقيقية ... و إن المخلص زاره ... و إنه استقبله كويس